

ԿԱՅԾՈՒՆ ԱՄՐՈՅՐ

Գ. Ս. ՇԱԽԿՅԱՆ

Միջնադարյան Հայաստանի կարևոր, սակայն չուսումնասիրված ամրոցներից է Կայծոնը՝ պատմական Գուգարաց նահանգի Ձորոփոր գավառում: Հանդիսանալով միջնադարյան Հայաստանի աչքի ընկնող պաշտպանական հենակետերից մեկը, Կայծոնը Կայան, Լոռի, Գագ, Ախթալա և այլ ամրոցների ու բերդերի շարքում կարևոր դեր է խաղացել Հայաստանի հյուսիսարևելյան շրջանների անվտանգության, կենտրոնական Հայաստանից Գուգարքով դեպի Վրաստան տանող ճանապարհի մատույցների պաշտպանության գործում:

Ամրոցի շինարարության ժամանակին վերաբերող ամենավաղ տեղեկությունը, որ հանդիպում է հայ մատենագրության մեջ, պատկանում է XIII դարի պատմիչ Մխիթար Այրիվանեցուն, որը խոսելով Գրիգոր Մագիստրոսի մասին, գրում է. «Սա է որդին Հոլում Վասակայ՝ շինողին Բջնոյ, Կայենոյ և Կայծոնոյ»¹:

Պատմական աղբյուրներից իմացվում է, որ Կայծոնը մի շարք այլ բերդերի թվում պատկանել է Բագրատունիների Կյուրիկյան շառավիղներին: Ինչպես հիշատակում է Վարդան պատմիչը, Աշոտ Ողորմածի մահից (977 թ.) հետո նրա կալվածքները բաժանվում են երեք որդիների՝ Սմբատի, Գագիկի և Գուրգենի միջև. «... և կրտսեր եղբայրն ժառանգէ զՏաշիր Սելորդւովքն Ձորոյգետին. և զԿայեն և զԿայծոն, զԽորխոռունիք՝ որ ՚ի Խոռայ շինեցաւ, որ է Խոշոռնի և Խոռակերա, և զԲագունիք՝ որ է Բագկերտ ՚ի գաւառն Տաշրայ. և այլ բերդք անուանիք եհաս Գուրգենայ, զոր Վիրք Սոմխէթ կոչեն»²:

Գագիկ I-ի (990—1020) մահից հետո նրա ավագ որդուն՝ Հովհաննես Սմբատին (1020—1041/1042) բաժին է ընկնում «... զԱնի և զՇիրակ, զսուրբ Գրիգոր Ձորովն Աշոցաց, զԱնբերդ և զդաշտն Այրարատեան, զԿայեան և զԿայծոն և զՏաւուշ դաւառն Սելորդեաց»³:

Կայծոն ամրոցի տերերի շարքում հիշվում է նաև Գրիգոր Մագիստրոսը (990—1058/1059), որն իր իշխանության կենտրոն ունենալով Բջնի ամրոցը, տեր է դառնում նաև Կայան և Կայծոն բերդերին: Սակայն Գրիգոր Մագիստրոսը երկար չի իշխում. նեղված սելջուկների արշավանքից, նա 1044 թ.⁴, ինչպես նշում է Վարդան պատմիչը, «... տայ զԲջնի ՚ի Մոնոմախն,

¹ Մ խ ի թ ա ռ Ա յ Ր ի վ ա ն ե ց ի, Պատմութիւն Հայոց, Մոսկվա, 1860, էջ 58—59:

² «Հաւաքումն պատմութեան Վարդանայ վարդապետի լուսաբանեալ», Վենետիկ, 1862, էջ 90: Տե՛ս նաև «Մեծին Վարդանայ Բարձրբերդեցոյ Պատմութիւն տիեզերական», Մոսկվա, 1861, էջ 122:

³ Վ ա Ր Դ ա ն, Հաւաքումն պատմութեան, էջ 92:

⁴ Հ. Մանանդյանի մոտ՝ 1045 կամ 1046 թ. (տե՛ս «Քննական տեսություն հայ ժողովրդի պատմության», հատ. Գ, Երևան, 1952, էջ 405):

և զԿայեան և զԿայծոն, զոր ընդ ձեռամբ իւր ունէր, և առնու զդքսութիւնն Միջագետաց»⁵:

1063 թ. գրված մի վավերագրից իմացվում է, որ Կայծոնը՝ մի շարք այլ բնակավայրերի և բերդերի հետ, նվիրված է եղել Հաղբատի վանքին. «... և մեր հայոց ազգքս ետուք սրբոյ նշանին Հաղբատայ վիճակն Աղուանից Տալօղն, Գօրականն, Ձորագեղն, Կայեանն, Կայէծօնն, Աղէստաֆէն, Խօջաբազարն, Մահկանն, Գաքէն, Շամբօրն, Շաքեն...»⁶:

Սելջուկ-թուրքերը սուլթան Ալփ-Արսլանի ղեխավորությամբ 1064—1065 թթ. գրավեցին Հայաստանի զգալի մասը, այդ թվում՝ Գուղարքը, որը նրանց ձեռքում մնաց մինչև 1118—1123 թթ., երբ վրաց թագավորությունը, Դավիթ Շինարարի օրոք հզորանալով, խլեց այն սելջուկներից և միացրեց Վրաստանին: XIII դարի Անանուն վրացի պատմիչի վկայությամբ, Թամար թագուհին (1184—1213) Իվանե Զաքարյանին արքունի մեծ վեզիր նշանակելիս նվիրում է նրան մի շարք քաղաքներ և բերդեր, որոնց թվում՝ Կայծոն ամրոցը. «Ողորմած լինելով հավատարիմների և յուրայինների հանդեպ՝ [Թամար թագուհին]... շնորհեց՝ Սարգսի որդի Հովհաննին (Իվանեին)՝ առաջնություն և գործակալի (մսախուրթուխուցեսի) պաշտոնը և ի պատիվ՝ Կայենն ու Կայծոնը, Գեղարքունիքով և այլ բազում հարկատու քաղաքներով, բերդերով ու երկրներով...»⁷: Գեղարդի արձանագրություններից մեկում ևս նշվում է, որ Իվանեի տիրապետության սահմանները տարածվում էին «առ ի Կայենով եւ Կայծոնով մինչև ի Բարկուշատ եւ մինչ ի Յականա եւ մինչ ի Նախճաւան եւ անդի մինչ ի Կարս...»⁸:

XIII դարի առաջին կեսին թաթար-մոնղոլների ասպատակությունները կասեցրին երկրի տնտեսական-մշակութային զարգացումը և պատճառ դարձան բնակչության զանգվածային արտագաղթի: Առանձնապես տուժեցին այն գավառները, որոնք գտնվում էին Զաքարյանների տիրապետության տակ: Պետք է ենթադրել, որ այդ ժամանակ Կայծոն ամրոցն արդեն կորցրել էր իր երբեմնի պաշտպանական-հենակետային նշանակությունը, քանի որ դրանից հետո ամրոցի այգօրինակ դերի վերաբերյալ հիշատակություններ չեն հանդիպում:

Հայաստանի հյուսիսային շրջանները, այդ թվում Կայծոն-Շնողը, հետագա դարերում ևս բազմիցս ենթարկվել են ասպատակությունների: Հատկապես ավերիչ են եղել լեզգիների պարբերական արշավանքները XVIII դարի երկրորդ կեսին, որոնց վերաբերյալ բազմաթիվ տեղեկություններ կան աղբյուրներում: Դրանցից մեկի մասին Լ. Նրզնկյանցը գրում է. «Ծերունիք մեր զեռ ևս յիշեն զամեհի արձակումն Օմար-խանին Աւարիոյ ի 1772 ամի 30000 հատընտիր լեկզի զօրօք, որ ոտնակոխ արարեալ զՎրաստան և զբոլոր նահանգս Բօրչալուի... ապա խուռն բաղմութեամբ ասպատակ սիռեալ ի Ձորագետն ի վեր, գերի արարեալ զբազմութիւնս ժողովրդոց էած ի Դաշրս»:

⁵ Վարդան, էջ 99:


⁶ «Լուսա», դիրք Ա, 1898, Տփղիս, էջ 263:

⁷ Լ. Մելիքսեթ-Բեկ, Վրաց աղբյուրները Հայաստանի և հայերի մասին, հատ. Բ, Երևան, 1936, էջ 13:

⁸ Դ. Հովսեփյան, Խաղրակյանք կամ Պոռչյանք հայոց սրատմության մեջ, Անթիլիաս, 1969, էջ 192 (հմմտ. Ղ. Նալչան, Այրարատ բնաշխարհ Հայաստանեայց, Վենետիկ, 1890, էջ 340, տողատակում):

է՝ փոքրիկ գետակով, իսկ արևելյան կողմից շրջափակված է հեղեղատներից առաջացած ոչ խոր ձորակով: Իր շրջագծով և բնական պաշտպանական համակարգով Կալծոնը շատ նման է Գառնիի, Անիի, մասամբ նաև Լոռի ամրոցներին:

Հրվանդանը և զերծը ժայռերի տարբեր աստիճաններում կան դժվարամերձ քարայրեր, որոնց ապավինել են տեղի բնակիչները հարձակումների և



Գծ. I

ավարառությունների ժամանակ: Դրանցից մեկի՝ հարավային կողմի բարձրադիր քարափում գտնվող «Ռամազի էրի» վերարերյալ Գ. Երզնկյանցը գրում է. «... ունի քարափի մեջ ցցած փայտե սեպեր, որոնց բռնելով և թև վրան կանգնելով, բարձրանալիս են և զել»¹⁶: Ամրոցի տառածքը հատկապես անմատչելի է հարավ-արևմտյան և հյուսիսային կողմերից, որտեղ ուղղաձիգ, գահավեժ ժայռերն ունեն ավելի քան 35 մ բարձրություն: Տափարակի չափը ամենաներկար մասում 580 մ է, ամենալայն մասում՝ 256 մ, մակերեսը կազմում է մոտ 6,5 հա: Այն ունի ոչ մեծ թեքություն (3,5 տոկոսից էլ պակաս)՝ արևելք-արևմուտք ուղղությամբ: Բարձրությունը ծովի մակերևույթից կազմում է 805—820,5 մ: Ներկայումս տափարակը կառուցապատված է բնակելի տներով, հիմնականում շինված վերջին տասնամյակներում:

Կալծոն ամրոցի պաշտպանական կառուցվածքներից շատ քիչ բան է մեզ հասել: Դրանք պարսպապատերի մնացորդներ են մոտ 10 մ երկարությամբ՝ ամրոցի տարածքի արևելյան անկյունածև մասի երկու կողմերում (նկ. 1, լուսանկարված է 1938 թ., նեղատիվը պահվում է Հայաստանի պատմության պետական թանգարանում): Հյուսիսային կողմի մնացորդներն ունեն 3—3,5 մ, իսկ հարավային կողմինը՝ 1,5—1,8 մ բարձրություն (այստեղ պատի որոշ մասը վերաշարված է): Պատը տեղական բազալտ քարի

¹⁶ Գ. Երզնկյանց, Հնությունը հայրենիքս, Կալծոն կամ Շնող, «Արձագանք», 1895, № 30, էջ 3:


խոշոր անմշակ կտորներից է, կիկլոպյան տիպի (առանց շաղախի օգտագործման) միաշերտ շարվածքով: Առանձնապես խոշոր են հյուսիսային կողմի քարերը, որոնց զգալի մասը ունի $1,0 \times 0,9 \times 1,2$ մ չափեր:

Նման տիպի շարվածքը, բնորոշ լինելով նախաքրիստոնեական շրջանի կառուցվածքներին, միջնադարյան Հայաստանի ամրաշինության մեջ քիչ է հանդիպում: Հնարավոր է, որ այդ մնացորդները գոյություն են ունեցել միջնադարից էլ առաջ, իսկ միջնադարում ներառվել են ամրոցի պաշտպանական համակարգի մեջ: Հետաքրքիր է, որ վերջին տարիներին ամրոցի տարածքում և մերձակայքում ի հայտ են եկել բրոնզե և պղնձե իրեր, խեցեղեն, քարարկղալին թաղումներ և այլն¹⁷, որոնք վկայում են, որ այս վայրերը բնակեցված են եղել վաղնջական ժամանակներից: Անշուշտ, վաղ է այդ մասին որոշակի խոսք ասել, քանի դեռ ամրոցի տարածքը չի ենթարկվել հնագիտական մանրադնին ուսումնասիրության:


Դ. Երզնկյանցը նշում է, որ «ինչպես ավանդաբար պատմում են, Գրիգոր մագիստրոս Պահլավունին գաջ ու կրիա ամուր պարիսպ է կառուցել տվել, որի հաստությունը երկու արշինից ավելի է, ունեցել է կամարակալ ընդարձակ դուռ, կողքերին երկու մեծ աշտարակներ: Բայց ավստ՝ս, որ այժմ գյուղացիք քանդել են թե՛ պարիսպը և թե՛ դուռը, քա-

րը իրանց շինությունց վրա գործածելով, իսկ տեղերն էլ իրանց տների համար բռնելով. այժմ հենց այս թամբուցումն կան և շատ մեծությամբ թափված հին պարսպի շաղախներ»¹⁸: Ինչպես պատերի մնացորդների շրջանում, այնպես էլ ամրոցի տարածքի այլ մասերում մեզ չհաջողվեց հայտնաբերել պարսպապատի շաղախի հետքեր: Սակայն դա չի բացառում ամրոցի պատերում (հատկապես «կամարակալ» մուտքի և կողքի աշտարակների շարվածքում) շաղախի օգտագործման հանգամանքը:

Բացի վերևում նկարագրվածից, պարսպապատեր գոյություն են ունե-



Նկ. 1



Նկ. 2

¹⁷ Հայտնաբերված իրերի զգալի մասը կարելի է տեսնել Շնող գյուղի միջնակարգ դպրոցի հայրենագիտական թանգարանում:

¹⁸ Գ. Երզնկյանց, նշվ. աշխ., էջ 3: Տե՛ս նաև Մ. Բարխուդարյան, Արցախ, Բաբու, 1895, էջ 388:

ցել նաև հրվանդանի այլ կողմերում¹⁹, որոնց հետքերը, որ անցյալ դարի վերջերին «հազիվ նշմարելի են» եղել, ներկայումս վերացված են. տափարակը եզերող ժայռերը ամբողջությամբ մերկացված են, շատ տեղերում դրանք բնակիչների կողմից վերածվել են քարհանքի:

Ամրոցի հիմնական մուտքը գտնվել է արևելյան կողմում, որտեղ տափարակը նեղ պարանոցով միանում է գյուղի ընդհանուր տարածքին: Այժմ էլ թաղամասի բնակիչների շրջանում շատ գործածական է «բերդի դուռ» արտահայտությունը: Տարեց շնողցիները հիշում են ամրոցի մուտքի երկու կողմերում աշտարակ-բուրգերի («բուրջ») և պարսպապատերի մնացորդները, որոնք եղել են մինչև 1900-ական թթ., երբ այդ մասերում ևս կառուցվել են բնակելի տներ:

Ամրոցի հիմնական մուտքի ընտրությունը կատարված է ռազմա-պաշտպանական խնդիրները, նաև բնական պայմանները վարպետորեն հաշվի առնելով, ինչպես Հայաստանի շատ ամրոցներում (Դառնի, Ամբերդ, Անի և այլն): Դանապարհը, հրվանդանին չհասած, թեքվում է հարավ և ընդհուպ մոտենալով ժայռերին (որոնց եզրագծով կառուցված են եղել պարսպապատերը), ուղղվում է դեպի հրվանդան, դրանով իսկ հնարավորություն տալով ամրոցի պաշտպաններին շատ նպաստավոր դիրքերից, հենց ամրոցի մատուցներում դիմագրավել հակառակորդի ուժերին: Հիմնական մուտքից բացի ամրոցն ունեցել է օժանդակ մուտք հարավային կողմից, որտեղ ժայռերը նվազ թեքությամբ իջնում են դեպի ձորը: Ամրոցի ջրամատակարարման մասին որոշ տեղեկություններ հանդիպում են Գ. Ծրզնկյանցի մոտ²⁰: Տարբեր ժամանակներում ամրոցի տարածքում կամ դրանից դուրս հողային աշխատանքների ժամանակ հայտնաբերվել են կավե խողովակներ: Հաստատվում է այն ենթադրությունը, որ ամրոցը խմելու ջուրը ստացել է Ս. Սարգսի բլրի արևելյան կողմի («Նէշի եզի կրոան») ձորում բխող աղբյուրից, որը ներկայումս էլ գոյություն ունի: Աղբյուրը գտնվում է ամրոցից բարձր տեղում, որը հնարավորություն է տալիս բլրի լանջով գցված կավե խողովակներով ջուրը ինքնահոսով հասցնել ամրոցի ցանկացած մասը:

Միջնադարյան Հայաստանի գրեթե բոլոր ամրոցները և բերդերը իրենց պաշտպանական համակարգում ունեցել են զաղտնուղիներ, որոնք ծառայել են ինչպես ջուր վերցնելու, այնպես էլ պաշարման ժամանակ արտաքին աշխարհի հետ կապ պահպանելու նպատակով: Այդ առումով Կայծոն ամրոցը բացառություն չի կազմել. մոտ մեկ տասնամյակ առաջ, ամրոցի հարավ-արևմրտյան մասում ավտոճանապարհի լայնացման աշխատանքների ժամանակ բացվել է հրվանդանի կողմից դեպի ձորն իջնող զաղտնուղի, թունելի ձևով, առանց ամրացման և արհեստական ծածկի (պատահարներից խուսափելու նպատակով այն ներկայումս փակված է)²¹:


Փոքրաթիվ են ամրոցի տարածքում պահպանված հուշարձանները: Դրանք երկու եկեղեցիներ են, տարբեր ժամանակների խաչքարեր և տապանաքարեր: Եկեղեցիներից մեկը, որ ավելի վաղ շրջանի է, գտնվում է ամրոցի տարածքի արևմտյան մասում, հարավային քարափից ընդամենը 6 մ հե-

¹⁹ Տե՛ս Ս. Զալալյանց, Դանապարհորդություն ի Մեծն Հայաստան, մասն Ա, Տփուս, 1842, էջ 82, 83: Գ. Ծրզնկյանց, նշվ. աշխ., էջ 3:

²⁰ Տե՛ս Գ. Ծրզնկյանց, նշվ. աշխ., էջ 3:

²¹ Գաղտնուղու մասին տե՛ս Վ. Ավետյան, նշվ. աշխ., էջ 133—134:

ռավորության վրա: Եկեղեցուց պահպանված են հյուսիսային պատը և ար-
սիճի մասը (նկ. 2, դժ. II, 1,2): Այն երկթեք կտուրով միանալով դահլիճ է՝
690×430 սմ ընդհանուր չափերով: Աղոթասրահը (380×282 սմ) արևելյան
կողմում ավարտվում է կիսաշրջան արքայիցով, որի երկու կողմերում զրեթե
սիմետրիկ դասավորված են 40×35 սմ չափեր ունեցող պատհաններ: Եկե-



Գծ. II

ղեցու տեղագրությունից երևում է, որ մուտքը եղել է արևմտյան կողմից:
Բեմի մասը լուսավորվում է 22×60 սմ չափերով պատուհանից:

Եկեղեցին կառուցված է տեղական բազալտի կոպտատաշ մանր քարի-
րից՝ կապակցված կրաշաղախով: Ստորին շարքերը և անկյունային մասերը
համեմատաբար խոշոր, կիսամաքրատաշ քարերից են, որոնց մեծ մասը
ներկայումս հանված է, և եկեղեցու մնացորդները փաստորեն հիմքերի հետ

կապվում են միայն պատի կես հաստությամբ: Պատերը համեմատաբար բարակ են (70—75 սմ), որը և եկեղեցու ավերման պատճառներից մեկը կարող էր հանդիսանալ, եթե նկատի ունենանք, որ ծածկը հղի է կիսագլանաձև թաղից՝ առանց ենթաթաղային կամարների: Թաղի ստորին շարքի մնացորդներ պահպանվել են հյուսիսային պատի վրա, որից երևում է, որ թաղը շարված է հղի երկայնական շարքերով մանր քարերից: Եկեղեցին հղի է սվաղված. աբսիդի և հյուսիսային պատի վրա ներքուստ կան սվաղի մնացորդներ: Կտուրի ծածկից ոչինչ չի պահպանվել:

Անցյալ դարի վերջին, ինչպես նշում է Մ. Բարխուդարյանը²², եկեղեցին ամբողջական ձևով կանգուն է հղի: Նրա շուրջը հին գերեզմանատուն է: Հարավ-արևելյան մասում գտնվում է ոմն Ավետիս քահանայի տապանաքարը՝ Ոհէ (1198) թվագրումով: Հավանական է, որ եկեղեցին կառուցվել է ավելի վաղ (համեմատյալ գեպոս, X դարից ոչ ուշ):

Այս եկեղեցին, ի տարբերություն գյուղի ուշ շրջանում կառուցվածների, աղբյուրներում չի հիշվում որևէ անունով: Ս. Զալալյանցը գրում է, որ «ի կողմն Արևելից այսր զղեկի (այսինքն՝ Կայծոռի — Գ. Շ.) է սագաշէն եկեղեցի յանուն սրբոյն Սարգսի»²³: Հավանաբար այս հիշատակության վրա հիմնվելով մեր ժամանակի որոշ հրատարակություններում եկեղեցին կոչված է Ս. Սարգիս²⁴: Սակայն Ս. Զալալյանցը այդտեղ նկատի ունի ամրոցի արևելյան կողմում, բարձր բլրի վրա ներկայումս էլ գոյություն ունեցող՝ Ս. Սարգիս անվամբ հայտնի մատուռը (նկատենք նաև, որ միանավ դահլիճը չի գտնվում հրվանդանի արևելյան կողմում, որպեսզի առիթ տար այն նույնացնելու «սագաշէն եկեղեցու» հետ):

Արևմտյան եկեղեցին, որ կոչվում է Ս. Գևորգ²⁵, տեղադրված է հրվանդանի կենտրոնական մասում՝ գրեթե երկայնական առանցքի վրա և անհամեմատ լավ է պահպանված (զծ. II, 3—5): Այն պատկանում է Հայաստանում ուշ միջնադարում շատ տարածված երկթեք կտուրով եռանավ դահլիճների տիպին, որի դասական հորինվածքը շատ տարածված էր վաղ քրիստոնեական Հայաստանում (Աշտարակ, Միծեռնավանք և այլն): Ինչպես հայտնի է, այդ տիպը հայկական եկեղեցական ճարտարապետության մեջ նորից տարածում գտավ XVI դարից սկսած: Ս. Գևորգը և նրան ժամանակակից եկեղեցիները, հիմնականում պահպանելով եռանավ դահլիճների դասական հորինվածքի հետ ունեցած ընդհանրության եզրերը, ստացել են նոր երանգ՝ հորինվածքային առանձին խնդիրների լուծման նոր արտահայտություններ: Հատակագծում այն ուղղանկյուն է՝ 1633×986 սմ չափերով: Աբսիդը և ավանդատները արևելյան կողմից սահմանափակված են ընդհանուր պատով: Աղոթասրահը (1085×812 սմ) երկու զույգ սյուներիով բաժանված է երեք նավերի: Կենտրոնական նավը կրկնակի անգամ լայն է եզրայիններից: Եկեղեցին ունի երկու մուտք՝ հարավային և արևմտյան ճակատներից: Աղոթասրահը լուսավորվում է հարավային ճակատի զույգ և արևմտյան ճակատի

²² Տե՛ս Մ. Բարխուդարյան, նշվ. աշխ., էջ 388, տողատակում:

²³ Ս. Զալալյանց, նշվ. աշխ., էջ 83:

²⁴ Տե՛ս «Արևելահայկա շրջանի կուլտուրայի հուշարձաններ», էջ 48:

²⁵ Տե՛ս Մ. Բարխուդարյան, նշվ. աշխ., էջ 388, 389: Գ. Երզնկյանց, նշվ. աշխ., էջ 2: Նշված էջերում գյուղի կենտրոնական մասում գտնվող եկեղեցին էլ անվանված է Ս. Սարգիս:

կենտրոնական մեկ պատուհաններից: Եկեղեցու նավերը, ինչպես նաև ավանդատները, ծածկված են կիսազլանաձև թաղերով: Նավերի թաղերի տարածական կոշտությունը մեծացվում է ենթաթաղային զույգ կամարների միջոցով, որոնք թաղի հարթությունից դուրս են գալիս 16 սմ շափով:

Եկեղեցու պատերը ներսից շարված են բազալտե մանր կոպտատաշ, իսկ դրսից՝ խոշոր սրբատաշ քարերով: Կամարները, որմնակամարները, սյուների միակտոր բները, ինչպես նաև արտիդի, դռների և պատուհանների եզրերը նույնպես սրբատաշ բազալտից են: Ճակատային հարթությունները պարզ են՝ առանց դեկորատիվ հնարքների: Եկեղեցու քիվը պահպանվել է միայն երկայնական ճակատներում. այն դեղնականաչավուն ֆելզիտից է՝ պարզ գոգավոր տրամատով: Մասամբ պահպանված է կտուրի կղմինդրի ծածկը: Հարավային մուտքի առանցքով՝ մուտքից 1 մ բարձրության վրա գտնվող քարի վերին ձախակողմյան անկյունում նշված է եկեղեցու կառուցման թվականը՝ 1893²⁶: Մակագրությունների այլ հետքեր հուշարձանի վրա նկատելի չեն: Ծիշտ նույնանման հատակազծային և ծավալա-տարածական հորինվածք ունի գյուղի կենտրոնական մասում գտնվող Ս. Սարգիս եկեղեցին՝ կառուցված Ս. Գևորգից մեկ տարի հետո (1894 թ.)²⁷:

Կայծոն ամբողջի հետ ժամանակագրական կապի մեջ է ամբողջ տարածքի հյուսիս-արևելյան զոգավոր մասում գտնվող խաչարձան-մատուռը (գծ. II, 6, 7)՝ միմյանց կից երեք խաչքարեր, առնված հատակազծում ուղղանկյուն կառուցվածքի խորշի մեջ: Խորշը արևմտյան կողմից է և վերևից ավարտվում է կիսաշրջանազծային կամարով: Ի տարբերություն կառուցվածքի մուտք մասերի, որոնք մանր կոպտատաշ բազալտից են, կամարի ճակատային քարերը դեղնականաչավուն ֆելզիտից են: Միջին խաչքարից վերև պատի մեջ թողնված է խորշ՝ 57×47 սմ շափերով, որի մեջ տեղադրված է հավասարաթև խաչ: Խաչքարերն աչքի են ընկնում շքեղ քանդակազարդումներով, որոնք հորինվածքային առումով գտնվում են փոխադարձ կապի մեջ: Երեք խաչքարերի համար էլ հորինվածքային հիմնական մոտիվը ծաղկած խաչն է՝ պուղակցված բուսական տարրերի (նոսան, խաղողի ողկույզների, ոստերի) հորինվածքների հետ: Վերնամասում հյուսիսային կողմի և միջին խաչքարերը պսակված են հավասարաթև զույգ խաչերի և երկրաչափական ձևերի համադրական մոտիվով. իսկ հարավային կողմինը՝ ցանցկեն նրբին հյուսվածքով: Քանդակներն աչքի են ընկնում հստակ գծագրությամբ, նկարվածքի պարզության մեջ: Խաչքարերին ընդհանրապես, սրանց ևս հատուկ է ավարտուն և ամբողջական հորինվածքը, բուսական և երկրաչափական մոտիվների համադրումը: Հարավային խաչքարի քիվի վերին գոտում կա արձանագրություն՝ Ս[ՈՒՐ]Բ Տ[Է]ՐՈՒՆԱԿԱՆՈՂ, որից և խաչքարը ստացել է Տերունական անունը (այն հայտնի է նաև Ս. Աստվածածին անվամբ): Խաչաթևերը եզերող կիսակլոր շրջանակից դուրս՝ անկյունային մասերում փո-

²⁶ Ս. Գևորգ եկեղեցին ամբողջի հետ փաստորեն ժամանակագրական կապի մեջ չէ. դրանց-րեղհանրությունը միայն տարածքային առումով է:

²⁷ Գ. Արզնկյանցը նշում է, որ երկու եկեղեցիներն էլ կառուցված են 1894 թ. (տե՛ս Գ. Երզնկյանց, Նշվ. աշխ., էջ 2): Ս. Սարգիս եկեղեցու հյուսիսային պատի մակագրու-թյան 1901 թվականի չի վերաբերում եկեղեցու կառուցմանը, քանի որ այդ եկեղեցին հիշվում է 1895 թ. հրատարակու-թյուններում:

րազրված է խաչքարի թվականը՝ ՈՀԱ (1222)։ Խաչքարերի հորինվածքային փոխադարձ կապից երևում է, որ դրանք նույն ժամանակի գործեր են։ Խաչքարերի առջևի մասում մեկ շարքում խոշոր բազալտե սալերից տապանաքարեր են, որոնցից մեկի վրա հստակորեն կարդացվում է ՎԱՆԾՆԻ անունը։ Հավանական է, որ այստեղ խաչքարերը ծառայել են որպես մահարձանների կամ գերեզմանական կառուցվածքի մաս։ Խաչքարերի տեղադրությունից պարզ երևում է, որ դրանք իրենց նախնական վիճակով չեն և հնարավոր է, որ նախապես եղել են առանձին պատվանդանների վրա։ Խաչարձան-մատուռն առնված է մոտ 10×13 մ արտաքին չափերով ուղղանկյուն պարսպի մեջ, որի արևմտյան կողմից դուռն է։ Պարիսպն իր շարվածքով նույնանում է մատուռի հետ և նրանց միաժամանակ կառուցված լինելն աներկբա է։ Պարսպից ներս գտնվում են նաև XIX—XX դդ. մեծ թվով տապանաքարեր (Բեկթաշյան տոհմի շառավիղների անուններով)։

Հնարավոր է, որ ամրոցը, բացի վերը հիշվածներից, ունեցել է և այլ կառուցվածքներ՝ ջրամբար, բաղնիք, թերևս նաև պալատական շենք և այլն (ինչպես Հայաստանի միջնադարյան մյուս ամրոցները)։ սակայն դրանց հետքերը կամ դրանց վերաբերյալ պատմական, մատենագրական տեղեկություններ առայժմ հայտնի չեն։

Կայծոռ ամրոցի հետ կապված կարևոր հարցերից մեկը նրա կառուցման ժամանակի պարզաբանումն է։

Ինչպես ասվեց, ամրոցի շինարարության ժամանակի վերաբերյալ տեղեկություն է հաղորդում պատմիչ Մխիթար Այրիվանեցին։ Եթե նկատի ունենանք, որ այդ մասին չեն պահպանվել վիմագրական կամ այլ բնույթի ուրիշ տվյալներ, ապա Մխիթար Այրիվանեցու հիշատակությունը այս հարցում պետք է լինի բացառիկ կարևոր սկզբնաղբյուր։

Հոլում Վասակը, որին վերագրվում է նշված ամրոցների շինարարությունը, ապրել է Բագրատունիների շրջանում, եղել է նրանց զորավարը և թագի հովանավորը²⁸։ Նրա նախնիները պատկանել են Կամսարականների տոհմին, որը քաղաքական ասպարեզից մոտ երկու դար հեռանալուց հետո՝ X դարի երկրորդ կեսին «իբրև կայծակ մը մոխրոց ներքե... վերայայտնեցաւ»²⁹ Պահլավունի տոհմանունով։ Բագրատունիների օրոք Պահլավունիները աչքի ընկնող ռազմաքաղաքական և տնտեսական-շինարարական գործունեություն են ծավալել։ Հոլում Վասակը՝ Վահրամ Պահլավունու, Գրիգոր Մագիստրոսի, Ներսես Շնորհալու և ուրիշների թվում տոհմին փառք բերող շառավիղներից է։

Աղբյուրներից իմացվում է, որ Վասակ Պահլավունին իր հարազատների հետ մասնակից է շատ շինարարությունների. կառուցել են «բազում եկեղեցիս եւ վանորայս»³⁰, «շինեալ բազումս, և զաւերեալսն նորոգեալ և այս ան-

²⁸ Հոլում Վասակի մասին տե՛ս նաև «Գրիգոր Մագիստրոսի թղթերը», Առաջարան (կազմող՝ Կ. Կոստանյանց), Աղեքսանդրապոլ, 1910, էջ 11։ «Սմբատայ Սպարապետի տարեգիրք», Վենետիկ, 1956, էջ 6—7։ Հ. Աճառյան, Հայոց անձնանունների բառարան, հատ. Ե, Երևան, 1962, էջ 49։ Մատթեոս Ուռհայեցի, Ժամանակագրություն, Երևան, 1973, էջ 8—9 և այլն։

²⁹ Ղ. Ալիշան, Շնորհալի եւ պարագայ իւր, Վենետիկ, 1873, էջ 23։

³⁰ И. А. Орбели, Надписи Мармашена, «Избранные труды», Ереван, 1963, էջ 442։

թիւս»³¹։ Սակայն նրա կյանքի և շինարարական գործունեության վերաբերյալ ժամանակագրական տվյալներ, որոնցից պարզ դառնար Կայծոռնի և մյուս ամրոցների շինարարության ժամանակը, հայտնի չեն։

Կայծոռն ամրոցի կառուցման ժամանակի հետ առնչվում է Վարդան պատմիչի տեղեկությունը Կայծոռն ամրոցը որպէս ժառանգություն Գուրգենին անցնելու մասին։ Յավոք, պատմիչի հիշատակությունից հայտնի չի դառնում, թե ամրոցը Գուրգենին երբ է անցել՝ Աշոտ Ողորմածի մահվանից անմիջապէս հետո, թե հետագայում³²։ Սակայն որոշակի է, որ ամրոցը Գուրգենին անցել է նրա թագավոր դառնալուց ոչ ուշ։ Այդ մասին Հ. Մանանդյանը գրում է. «Սմբատ Բ-ի կրտսեր եղբայրը՝ Գուրգենը, հավատարիմ լինելով նրան՝ ժառանգում է նրա հրամանով 982 թվին Տաշիրը, Տավուշը, Կայանը և մերձակա շրջանները, ու հիմք է դնում Կորիկյան թագավորության»³³։

Կյուրիկյան թագավորության հիմնադրման ժամանակը հեղինակների մոտ տատանվում է 969—982 թթ. միջև։ Մ. Զամչյանը, Հ. Մանանդյանը, Լեոն. Ե. Լալայանը, Աս. Շահնազարյանը և ուրիշներ ընդունում են 982 թ.³⁴։ Բոլոր պարագաներում բավականաչափ հիմքեր կան կարծելու, որ ամենաուշը 982 թ. Գուրգենը եղել է թագավոր, և Կայծոռն այդ ժամանակ արդեն գոյություն է ունեցել։

Կարևոր պետք է համարել այդ թվականի համադրումը Կայծոռն ամրոցը Հոլում Վասակի կողմից կառուցված լինելու վերաբերյալ Մխիթար Այրիվանեցու տեղեկության հետ։ Այդ համադրումը կատարելու համար անհրաժեշտ է իմանալ Հոլում Վասակի ծննդյան ժամանակը։ Դժբախտաբար, եթե Հոլում Վասակի մահվան թվականը (1020/1021) ուղղակիորեն կամ անուղղակիորեն հիշատակվում է մի շարք հեղինակների մոտ, ապա նրա ծննդյան թվականը չի ճշտված։ Մ. Հովհաննիսյանը, խոսելով Հոլում Վասակի անձնավորության մասին, նրա ապրած ժամանակը համարում է 950—1021 թթ.³⁵։ Որ Հոլում Վասակը չէր կարող ծնված լինել 950-ին, դա երևում է նրանից, որ նրա հայրը՝ Գրիգոր Համզեն ծնվել է 941-ին³⁶, մայրը՝ տիկին Շուշանիկը, 952-ին³⁷։ Նկատենք, որ Հոլում Վասակը երկրորդն էր Գրիգոր Համզեի որդի-

³¹ «Գրիգոր Մաղիստրոսի թղթերը», էջ 43։

³² Կա նաև կարծիք, որ Գուրգենը Գուրգենին է անցել Աշոտ Ողորմածի կենդանության ժամանակ (տե՛ս Ի. Հարությունյան, Սանահին, Թիֆլիս, 1898, էջ 7։ Ղ. Մովսեսյան, Լոռիի Կյուրիկյան թագավորներու պատմությունը, Վիեննա, 1923, էջ 10։ Ա. Ալպոյան, Պատմական Հայաստանի սահմանները, Կահիրե, 1950, էջ 126 և ուրիշներ)։

³³ Հ. Մանանդյան, Քննական տեսություն հայ ժողովրդի պատմության, հատ. Բ, մասն Բ, Երևան, 1960, էջ 47։

³⁴ Կյուրիկյան թագավորության հիմնադրման ժամանակի և հիմնադրի վերաբերյալ այլ լաբիչ է հայտնվում «Հայ ժողովրդի պատմություն։ Սկզբից մինչև XVIII դարի վերջը» (Երևան, 1975) գրքում (տե՛ս էջ 451—452, 462)։

³⁵ Տե՛ս Մ. Հովհաննիսյան, նշվ. աշխ., էջ 538։

³⁶ Տե՛ս Մ. Զամչյան, Պատմություն Հայոց, հատ. Բ, Վենետիկ, 1785, էջ 892։ Ղ. Ալի-ան, Շնորհալի ե պարագայ իւր, էջ 12։ «Գրիգոր Մաղիստրոսի թղթերը», էջ Ժ։ Ե. Քասունի, Աշոտ Ողորմած և իր շրջանի հայոց հոգևորական վիճակը, Բեյրութ, 1939, էջ 37։ Հ. Աճառյան, Հայոց անձնանունների բառարան, հատ. Ա, Երևան, 1942, էջ 542։

³⁷ Տե՛ս Ի. Քասունի, նշվ. աշխ., էջ 37, 40։ Հ. Աճառյան, Հայոց անձնանունների բառարան, հատ. Դ, Երևան, 1948, էջ 181։ «Գրիգոր Մաղիստրոսի թղթերը», էջ ԺԵ։

ների մեջ (ավագը Վահրամն էր՝ ծնված 967 թ.)³⁸, և 982 թվականին, հրե արդեն գոյություն է ունեցել Կայծոն ամրոցը, նա կլիներ 15 տարեկանից փոքր, ուստի, բնականաբար, չէր կարող հանդիսանալ «շինող... Կայենոյ և Կայծոնոյ»:

Սակայն պարզ է, որ Հոլում Վասակը կարևոր դեր է խաղացել Կայծոնի շինարարական կյանքում, այլապես նրա անունը չէր կապվի ամրոցի շինարարության հետ: Հնարավոր է, որ նա աչքի ընկնող աշխատանքներ է կատարել արդեն գոյություն ունեցող ամրոցի պարսպապատերի ամրացման, նորոգման, թերևս նաև այլ կառուցվածքների շինարարության գծով, որոնք կարող էին շարունակվել և լրացվել հետագա տերերի կողմից, ինչպես այդ հիշվում է Գրիգոր Մագիստրոսի անվան հետ կապված³⁹: Կարելի է ասել, որ Կայծոն ամրոցը Հոլում Վասակի կողմից կառուցված լինելու վերաբերյալ Մխիթար Այրիվանեցու հիշատակությունը բավարար հիմք չի տալիս որոշելու ամրոցի կառուցման ճիշտ թվականը: Փաստորեն ամրոցի գոյության ամենավաղ հավաստի թվագրումը համընկնում է Գուրգենի թագավոր դառնալու (իմա՝ Կյուրիկյան թագավորության հիմնադրման) ժամանակին: Ավելի վաղ շրջանում ամրոցի գոյության վերաբերյալ առաջժամ արժանահավատ տվյալներ կամ տեղեկություններ հայտնի չեն:

КРЕПОСТЬ КАЙЦОН

Г. С. ШАХКЯН

(Резюме)

Крепость Кайцон в с. Шнох Туманянского района АрмССР, одна из оборонительных опорных точек средневековой Армении, до сих пор не подвергалась специальному исследованию. Из оборонительных сооружений и архитектурных памятников, находившихся на территории крепости, до нас дошло очень немного—остатки крепостных стен, церкви, хачкары. На основе анализа фактического материала в статье исследуются сохранившиеся сооружения, затрагиваются вопросы, связанные с оборонительной системой крепости, временем ее постройки.

³⁸ Տե՛ս «Գրիգոր Մագիստրոսի թղթերը», էջ ԺԶ: Լեո, Երկերի ժողովածու, հատ. II, գիրք I, Երևան, 1967, էջ 642—643 և ուրիշներ:

³⁹ Տե՛ս Գ. Երգնկյանց. նշվ. աշխ., էջ 3: